



# Rezistans ek Alternativ

Mother Courage Centre  
Bois-Cheri Road | Moka  
Republic of Mauritius

...

+230 433 64 31 | rezistans@freeitmauritius.org  
<https://facebook.com/reziste>

---

## Kominike de pres

### *Arestasion Rama Valayden*

13.05.2023

Rezistans ek Alternativ solider de Rama Valayden ki finn arete par la Polis. Sarz sou lakel pe pourswiv Rama Valayden '*perverting the course of justice*' se enn nouvo deli. Sa konfirm ki diferan amandman a lalwa ki finn amene resaman pe fer kont tou opozision politik. Se pou sa rezon la ki Rezistans ek Alternativ pe denons seki nou pe apel enn '*obsesion maladif*' de rezim anplas ki pe fer absoliman tou pou ter tou form opozision ou kritik a legar MSM. Ena plizir anomali dan interpelasion Rama Valayden ki pous a bann kestionnman serie lor deriv Leta.

*Ki nesosite ki lapolis ti ena pou al prezant de fason osi spektakiler ek gramatin boner pou sa interpelasion la?*

*Kifer se lekip Special Striking Team ki finn al aret Rama Valayden? Eski se enn vanzans personel ki sa skwad la pe tire kont lekel Rama Valayden ki finn amenn boukou kritik?*

*Eski Interpelasion Rama Valayden form parti de enn seri arestasion kont bann opozan politik, kouma Bruneau Laurette avan, pou fer per ek anpes tou form opozision a rezim Sun Trust?*

Rezistans ek Alternativ tenir a rapel ki Rama Valayden enn opozan politik ki pe kontribiye boukou pou expoz pourtir rezim o pouvwar ek o sin de sartin institision Leta. Li inportan rapel ki se Rama Valayden avek enn lekip avoka ki'nn permet fer lalimier lor karakter mertrie de lamor ex-azan MSM Kistnen, alors ki lapolis ti pe dir swisid. Sa mem la polis la ki zordi pa pe donn okenn swit a lanket lor lasasina Kistnen ek ki pe paret prefer vinn zouti perserkision kont tou kritik a gouvernman MSM.

Dan bann moman kot ena otan deriv, Rezistans ek Alternativ apel a lepep Moris pou pa sed a la per ek a enn sirso pou kondann tou tantativ pou fer silans ek intimid ninport ki sitwayin ki pe exprim enn lopinion kontrar a sa gouvernman la. Rezistans ek Alternativ osi apel a tou bann instision Leta, sirtou zidisier pou fer kontrepwa a direksion totaliter ki gouvernman Pravind Jugnauth pe pran.

Stefan Gua & Kugan Parapen  
Pou Rezistans ek Alternativ